

العمر اتصَفَى



العمر اتصَفَى وضَرَبَهُ السَّوسُ،

والجسم أهو صابر على بلواه

وف طول وف عرض يقول منحوس،

وسنين الحزن بتجري وراه

"سبحان الله"

والمشهد تاني بيتكرر

والخلوف حلقه كمان مرّر

والوشّ أهو كاره يتصور

والحسرة معاه

زعلان ع العمر اللي اتصفى

والقلب اللي ماعمره اتدفى

والكفة أهي مالت والدفة

طار منها السوس،

والجسم اهو عايش يتكفى

مستني وجاهز للزفة...

على فرش تابوت

ويحلم بلباس العفة

ويمصمص شفة على الشفة

وبيكتم حزنه اللي معشش..

لسنين جواه

بيحاسب نفسه أما تنافسه

وبيهرب من حزنه ، ويأسه

على طول ويّاه